

四庫全書

集部

欽定四庫全書

集部

古穰集卷十三至

詳校官編修臣翟槐

中書臣劉源溥覆勘

總校官原任中允臣王燕緒

校對官中書臣李槃

謄錄監生臣官懋弼

欽定四庫全書

古穰集卷十三

明 李賢 撰

神道碑銘

通議大夫禮部左侍郎兼翰林院學士薛公神

道碑銘

吾道正脉實由近世周程張朱有以倡明之也至我太宗文皇帝乃始表章其言行天下由是天下士習一歸

於正嗚呼盛哉然今之君子能忻慕而篤信之則河東薛公其人也公諱瑄字德溫世為山西河津人其先自奚仲封薛侯居河東子孫遂以為氏曾祖常祖仲義皆通經教授鄉里父貞洪武初領鄉薦為真定元氏教諭仲義貞俱以公貴贈通議大夫大理寺卿祖母母皆淑人初母齊淑人夢一紫衣人謁見已而生公祖以生時卜之吉曰此子必大吾門童時教之詩書輒成誦日記千百言貞為滎陽教諭公侍行時年十二以所作詩賦

呈監司監司奇之既而聞魏范二老先生深於理學乃  
禮延於家供子弟職日與講習周程張朱性理諸書久  
之嘆曰此道學正脉也遂焚其所作詩賦專心於是至  
忘寢食永樂己亥貞改河南鄆陵時教官考績以科貢  
多寡為黜陟貞大以為憂公乃補鄆陵諸生遂中河南  
鄉試第一明年登進士第以省親西歸是歲秋貞有疾  
公日夜不離左右及居喪一遵古禮服闋願就教職會  
宣廟思得良憲臣選擢雲南道監察御史出監湖廣銀

場公聞前監者多致富至則黜貪墨正風俗手錄性理大全一書潛心誦讀每至夜分方寢或思有所得即起燃燭記之或通宵不寢味而樂之不知手舞足蹈也丁繼母憂服闋會有言學政不舉者吏部尚書郭璉首薦公提調山東學校公欣然就之曰此吾事也每臨諸生必親為講解不事夏楚皆呼之曰薛夫子未幾用楊文貞公薦召為大理寺右少卿明日轉左少卿公作大理箴以自警時中官王振權傾一時或欲邀公拜其門公

正色曰安有受爵公朝拜官私門邪已而遇諸途衆行  
跪禮公獨不屈振由是不悅會有獄夫實病死三年其  
妾私於人欲出嫁妻弗聽遂誣妻魘魅夫死公為辨其  
冤都御史王文諂事振乃誣公出入人罪繫獄當死人  
皆危之公怡然曰辨冤獲咎死何愧焉手持周易誦讀  
不輟至覆奏將決大臣有申救之者得免官放歸田里  
公居家六年閉門不出留心理學造詣益深正統己巳  
以吏科給事中程信論薦起公為大理寺丞時敵騎薄

都城公分守北門都帥初疑其迂及接言論遂訪策焉  
公曰以天時人事驗之此敵必宵遁旣而果然貴州苗  
寇猖獗朝廷命將往征之公督軍餉事竣而還景泰初  
懇乞致仕學士江淵上疏留之明年陞南京大理寺卿  
有富豪殘虐人命者獄久不決執法者欲貸之公曰死  
者何辜竟抵於法明斷之譽播於民謠刑部尚書楊寧  
都御史張純初以材力相尚及與公同事嘆曰如薛公  
當於古人中求之中官金英奉使道出南京公卿俱餞



於江上公獨不往英至京言於衆曰南京好官惟薛卿耳壬申秋召至京復為大理寺卿有草場火朝廷欲置典守者罪公力辨之獲免蘇松有飢民乞粟富家吝而不與遂火其屋蹈海以避罪時遣太子太保王文往廉之文以謀叛籍其家衆皆畏勢莫敢發公抗章辯之文亦悟其非獲免者甚衆是歲公年近七十復乞致仕不允天順改元英廟復位素知公學行遷禮部右侍郎兼翰林院學士召入內閣知制誥尋主考會試事竣轉左

侍郎居數月公見將臣石亨等竊弄威權嘆曰君子見  
幾而作豈俟終日乎遂引疾懇乞致仕居家八年四方  
學者從之甚衆公惓惓以復性為教嘗曰此程朱喫緊  
為人處而歐陽公言性非所先誤矣又曰學者讀書窮  
理須實見得然後驗於身心體而行之不然無異於買  
櫝而還珠也忽遘疾彌留衣冠危坐於正寢精神不亂  
悠然而逝時風雷大作有白氣上升天順甲申六月十  
五日也距生洪武乙巳八月十日享年七十有三配甯

氏贈淑人生子四人長曰溥次曰淳次曰濬邑庠生早  
卒次曰治亦卒孫男四人襁登天順甲申進士第孫女  
五人嗚呼公之學踐履篤實之學也嘗曰格物只是格  
箇性吾於日用之間必體察之何事是仁之發見何事  
是義之發見至於萬物各具一理萬物同出一原是其  
貫通處也每以聖賢為師隨其所寓圖書箴規一言一  
動於理稍有違失便覺身心不安凡辭受取與必揆諸  
義一毫不苟晚年玩心高明默契其妙有不言而悟者

矣其出處大節光明峻潔於富貴利達泊如也接人無  
大小衆寡一以誠待之教之有序而其言平易簡切不  
為穿鑿竒僻之說為文必根於理辭旨條暢所著有讀  
書錄行於世河汾集藏於家嗚呼宣德甲寅秋予始識  
公於河津知其造詣之深自後仕途南北弗獲相從有  
時同朝亦各守職務或有所疑但手書質問而已天順  
初公入內閣予亦濫與其間曾未數月公致仕去矣有  
道者之難遇也如此公之沒也四方之士聞之莫不嘆

悼朝廷得訃遣官諭祭其家復令有司營葬事襚乃以公門人國子監丞閻禹錫之狀來請銘其神道之碑嗚呼予豈足以知公也哉然義有不可辭者銘曰昔有王氏鳴道河汾流風餘韻以啓後聞相彼薛公不以自足濂洛關閩意向尤篤學優而仕實始為親仕日以進學日以新學匪辭華實欲聞道身體力行遂以深造惟公之心勝已之私惟公之迹不愠不知富不倖求難不苟免隨寓而安名亦不顯成彼後學篤是先賢在古為難

公無間然嗟今之人無公所好公今已矣誰臻其奧我  
銘其隧以詔鄉人千載而下庶得其真

資德大夫正治上卿南京戶部尚書張公神道  
碑銘

公諱鳳字子儀先世滄州鹽山人後徙真定之安平曾  
祖才興祖德林俱潛德弗耀考益故為禮科給事中與  
德林俱用公貴贈資政大夫戶部尚書祖母王氏母李氏  
俱贈夫人初李氏有娠一夕夢大星出懷中覺而生公

人以為異三歲取父書作讀誦狀識者知有奇志鄰有  
病召巫治之公往觀竟不驗扣其神曰卿相在此公去  
神乃降衆驚異曰此子殆不凡者稍長從太常少卿鄭  
雍言授春秋經每有講說即能問難穎悟異常已而母  
病躬侍湯藥衣不解帶母卒居喪盡哀人服其孝永樂  
己丑北敵侵邊文廟親征以給事君贊理戎務因主將  
失利沒於陣公時年十四大父母垂白在堂家道蕭然  
公哀毀踰禮與兄奉祖還家竭力事養得其懽心久之

有司聞公孝友選為邑庠生公益奮力於學雖祁寒暑雨不輟遂領鄉薦入太學時鴻臚序班缺員例選北人為之吏部尚書蹇忠定公義見公異之曰是生不可就此職也宣德丁未登進士第癸丑春擢刑部江西司主事時江西豪民為逆者千餘人繫獄未決付公理之公一訊皆得其情獄上獲生者數百人能譽大振大司寇嘉公之才特令總闔部章奏及錄在京逮繫者正統戊午冬特陞本部右侍郎由主事進侍郎者自公以前未



有也已未夏以京城草場出納多弊敕公巡督之辛酉  
春改南京戶部右侍郎公上疏曰南京根本重地糧不  
可不素蓄宜每歲分米二百萬石遂定為令往年南京  
藟粟專委之憲臣至是勅公兼督蓋以出納嚴慎故也  
時人以公執法呼為張板朝廷亦知其名已巳春賜璽  
書嘉勞有清勤公正之褒賚以白金文綺景泰壬申春  
陞本部左侍郎未幾進尚書明年廷議謂公素有譽望  
乃轉兵部尚書叅贊守備機務又明年召為戶部尚書

時邊務方殷錢穀之費動以萬計多以不給為憂公至處之裕然國用不勞而足天順改元皇上復位思南京舊都得舊人庶可以厭衆心仍命公為南京戶部尚書兼督糧儲辛巳春以考績赴闕上慰勞有加公以足疾懇辭休致不允舟還疾作未抵任而卒是歲三月十八日也距生洪武丙子九月四日享年六十有六公為人正直而心地平易遇事敢為人不敢以私干之尤篤於友義同門蹇於仕途者必極力助之故人李恂為太常贊

禮卽母老子幼夫婦相繼而卒公惻然遂養其母以終  
聘其女為子婦教養其子至於成立又急於濟人嘗渡  
江偶遇一舟覆於急流公即捐白金購人救之舟中之  
人賴以全活性尤真率客至即出酒殽對酌為樂不計  
豐約與之接者未嘗不稱為朴實君子人也歷官幾四  
十年勤慎如一日曾無過舉卒之日有司以訃聞上深  
悼之遣官諭祭賜以賻儀復令有司為治墳墓給官舟  
歸葬於鄉公配李氏累封夫人子男三人長曰愷次曰

悌次曰忤女二人長適王玘次幼在室孫男六人孫女  
二人銘曰侃侃張公生也不偶大器宏才童時已負乃  
承家學乃掇巍科歷躋膺仕不偏以頗不偏以頗時呼  
為板愈見其操孰不嚴憚允顯天性孝友諄諄濟物之  
心一何孔仁既參兵戎復總餉饋茂績宏昭光我士類  
稽其終始惟忠惟勤懿此言行蔚為名臣褒典式承存  
沒無間嗚呼張公全歸於善

資善大夫南京刑部尚書耿公神道碑銘

今之公卿大夫功業文章表著天下者甚盛如司寇耿公所存所行尤不易得蓋清潔之志如金石之不可奪也嗚呼難哉公諱九疇字禹範別號恒菴初母妊公時忽夢神告曰吾自冠山來當大汝門覺而公生自幼穎敏讀書必究義理弱冠為邑庠生登永樂甲辰進士第宣德辛亥擢禮科給事中凡事務存大體有清譽正統改元之明年大臣言兩淮鹺政之弊必得重名檢者理之於是推公為鹽運司同知公巡行諸鹽場盡革宿弊

公私便之復條奏數事曰均搭派節樣鹽二事遂著為  
令癸亥丁母太淑人憂鹽場數千人詣闕留公從之乃  
進陞鹽運使公益循法責效廉名大著嘗坐水傍一童  
子曰水清不如使君之清公因號恒菴以自勵尋以註  
誤逮至京事白朝廷知公廉正特陞刑部右侍郎屢與  
同官辨疑獄不為勢利所怵有婦誣其夫衆欲斷異公  
曰不可杖其婦而歸之人服其當未幾有邊警乘輿出  
巡以公留守京師既而鳳陽歲凶盜起復敕公往綏之

公乃留英武飛熊諸衛軍耕守以杜奸寇覬覦之心招徠流民七萬餘戶一方晏然兩淮鹺政自公去任多廢至是復屬公兼理之於是奏罷易米法申飭條戒有加於舊尋復勅公巡撫江北諸郡公益盡心宣布德意凡可以惠民者無不極力為之景泰初敕公審錄諸郡大辟囚公曰洗冤澤物吾所願也凡以情得原者二十六人有來婦人何菊家者既去而死其家訟菊與弟殺之菊誣服公驗其無實而釋之後知殺者果仇人也人服

其明代還適議關中重地守臣缺人僉謂非公不可特  
勅公以往既至革弊黜貪威望愈振初六部卿佐使外  
文移不得徑下按察司以故偃蹇不受約公首奏下之  
邊將請於臨洮諸衛添取防兵朝廷下公議公上疏言  
邊城士卒不為少矣在為將者馭之何如耳果能嚴紀  
律精練習勤撫恤絕侵漁以養其銳氣則一可當百加  
以賞罰明信則人人自奮而悍敵不足慮矣不然添兵  
何益徒冗食耳遂從公議初邊民春夏就田耕作秋冬



移入公疏言邊將所以禦敵而衛民也今民自避兵而失恒產將何為哉乞委邊將以止移入不能衛者罪之民皆稱便朝廷以公兼理戎務宜居憲職遂轉都察院右副都御史仍鎮其地公聞朝廷下有司買羊角以充燈費上疏曰昔宋神宗買浙燈而蘇軾輒諫止之此忠臣愛君之至情也今買羊角製燈無乃類是書曰不矜細行終累大德遂止繼以災異下詔求直言公復上疏曰天地間有必然之理有或然之數理可盡而數不可

泥臣願陛下延儒碩以廣聰明公賞罰以別忠邪擇守令以惠黎庶簡將帥以固邊疆此必然之理不可忽也優詔答之天順改元皇上復位思公可大用顧侍臣曰耿九疇廉正人也即召為右都御史士類皆賀臺憲得人時子裕任給事中公言父子同在要地非宜遂改裕為翰林檢討公自幸遭遇思圖報稱首進五事曰崇廉耻以勵士風清刑獄以召和氣勸農桑以厚民生節糧賞以簡軍士任臺諫以振綱紀上皆嘉納之因敕戒風

憲公進御史告曰朝廷望治於憲職至矣各宜澡滌以副任使不然吾不汝貸衆皆悚息風紀為之肅清時邊情不寧將臣急命公將率諸道御史劾之事泄反為所訴置公等於理公引咎自當朝廷察非公罪出為江西右布政使尋陞四川左布政使明年召為南京刑部尚書先在職者流於諧俗有乖清議公至肅然自歸於正天順四年八月二十九日忽遘疾不語移時而逝距生洪武二十九年四月十三日享年六十有五訃聞上深

哀悼遣官諭祭於其家復令有司為營葬事士大夫識  
與不識莫不惜之公天性孝友親終追思不忘遇亡日  
悲痛如初喪時事三兄恭而盡禮嘗脩耿氏家乘以昭  
先德平生慕司馬溫公為人敦尚古道耻同流俗奉身  
節儉無他嗜好公退居家惟焚香讀書而已交人不泛  
關節不至其門雖權貴亦敬憚不敢犯凡論事是非確  
然不撓未嘗詭隨於邪正之辨尤嚴坐是與眾寡合累  
遭讒困賴上知其所存卒保全之公先世東鹿人有諱

昉者仕金為平定軍指揮使因家平定州有諱守直者  
務儒業舉進士任總帥府教授高祖復仕元為大都路  
知事曾祖文大寧路推官祖承祖太常太祝考綱通經  
學洪武中為河南盧氏縣學教諭卒葬金谷陀之原子  
孫遂為盧氏人與太祝公俱贈通議大夫刑部右侍郎  
妣和氏累贈太淑人配高氏累贈淑人子男三長曰智  
次即裕今為泗州判官次曰發女六長適都察院右僉  
都御史葉盛次適渭南醫官張瓘次適張暹次適舉人

張紀次適主事王上齡次幼孫男七女二卜葬於先塋  
之次裕詣京師持鄉人左都御史軒公狀乞予為神道  
碑予亦鄉人也不可辭則序而銘之銘曰麟之祥蹄鳳  
之瑞蹠實難其逢云誰不惜有若斯世挺生偉人玉立  
清脩如鳳如麟有偉耿公鉅鹿之胄一時英賢鮮出公  
右蚤登仕版青瑣黃門直道而行邁於前聞齟政旣清  
疑獄旣辨乃整邊防乃正臺憲周思職務寢不遑安出  
領二藩之屏之翰冰壺湛然不容少滓初志如山死而

後已百鍊之剛不損毫芒南畿作士帝寵煌煌知無不  
言言則剴切社稷是安旣安乃悅繫公之喪士類所宗  
譽流無窮惟公之終

中憲大夫南京都察院右僉都御史張公神道  
碑銘

天順庚辰冬十一月南京都察院右僉都御史張公致  
慶禮於京師居公邸數日一疾而逝是月七日也上聞  
訃驚悼良久特遣官諭祭復令有司為營葬事其子銜

哀乞碑銘於予按其鄉人編脩楊守陳狀公諱楷字式之浙之寧波慈溪人天資穎敏讀書過目即成誦年十二能屬文有司聞其名召補邑庠生公益奮力進學十七領鄉薦登永樂甲辰進士愈肆力於古文辭宣德改元之明年試政於夏官時方北征輿馬之需甚急大司馬雅知公才委往關中督之果先期而集拜江西道監察御史初有強盜繫刑部獄中吏受賕脫之公劾其尚書以下十數人皆罷黜名聲赫然六年考績至行在因



獻聖德頌留侯鴻臚寺正統初乃還在任能辨疑獄有  
造偽印者本夏三也賂書牒人吳謙承之公廉得其實  
以罪三有與妖僧作逆事者連坐其主當族公察之逃  
日所為主得勿論有兄毆人死誣與弟同毆歷臺審無  
能辨之者公察其枉謂毆時爾安在曰在鄉學乃拘其  
師友驗之果然遂釋之此類甚多庚申用大臣薦陞陝  
西按察司僉事理屯田督租賦治水利俱有成績尋遷  
副使時靖遠伯王驥奉敕巡邊以公同行公上安邊十

二策多見采者丁卯陞都察院右僉都御史畿甸蝗起上命公督捕公授郡邑捕法而按行之蝗遂息閩賊鄧茂七作亂朝廷遣將率兵往平之以公為監軍兵至廣信賊黨圍延平甚急公謂都督劉聚曰賊聞大軍至寧無懼心即具榜遣人馳諭以威信賊果解去兵至沿山賊圍將樂公調都督劉得新乘夜襲之賊皆潰散茂七僅以身免退保陳山公駐兵建寧四招其黨賊復攻延平公以浙江軍伏後坪南京軍伏後洋江西軍伏沙溪

之南而以福建軍素為賊所易者出城挑之已而礮作  
伏起合擊大破之遂斬茂七俘其衆未捷之先朝廷慮  
賊衆兵寡復遣寧陽侯陳懋統大兵繼之至則茂七已  
誅餘賊有據九龍山者公選精兵二千撤其筏誠曰明  
日賊必空寨來攻若疾入其寨而反攻之比旦賊視我  
營兵少果至溪上無筏而還二十兵已據其寨用其滾  
木礮石下殪之賊衆遂降凡定三郡七縣破三十六寨  
擒偽總兵學士等官三百二十四人招徠其民八十餘

萬初處州賊葉宗留亦起已遣都督徐恭征之至是復  
勅公旋師與之掎角恭次金公山甚危公往援之至即  
伏兵樹鴨兒芭為壘賊至公麾兵擊之少頃佯走賊追  
逼壘伏兵四起一鼓殲之景泰改元公班師至京有妬  
其功者劾公初至耽詩玩寇以罪罷歸天順改元皇上  
復位念公之勞仍舊官致仕明年陝右興師禦邊而給  
軍餉增戰騎募勇士以佐師者難其人適公至京入謝  
上見公曰朕得其人矣遂以公往還京上嘉勞之轉南

京都察院方專委託而數止於斯豈非命邪公生於洪武三十二年三月二十三日享年六十有三曾祖好古祖叔申俱潛德弗耀父惟哲尚義攻詩以公貴贈監察御史母毛氏贈孺人娶邱氏贈孺人繼室胡氏封孺人子男三長應麒寧波府醫學正科次應麟寧波衛鎮撫次應鵬以懷材抱德舉待選於吏部女二長適余凱次適萬宗希孫男幾人女幾人公早孤事母至孝為人瀟灑心地坦夷好獎引士類見人有善必延譽之遇患難

者必拯濟之尤喜賓客篤於友道其學浩瀚善行草隸篆所著有四經糠粃大明律解律條撮要諸書至於選詩唐音李杜詩草堂詩餘凡十數家公悉和之累數百卷皆豪贍壯麗海內之士莫不口腴而心悅之外國亦市其集而慕其風采狀之所稱者如此銘曰香蘆句餘扶輿磅礴金玉丹砂乃氣之略必有精者屬之於人奇士挺生適逢其辰翼翼張公其氣秀越玉佩瓊琚文采煥發駁歷中外名振臺端敵愾之績人以為難螢迹微

嫌曾無少損晚復登朝益篤忠悃皇恤公死異數惟加  
浙東故里有賁無涯行實可稽壟有貞石銘以傳之永  
永無斁

中順大夫詹事府少詹事劉公神道碑銘

聖朝承平相繼將百年於茲而博雅老成之士歌詠贊  
襄於其間以賁飾一代之盛者屢見於世若詹事府少  
詹事姑蘇劉公其一人焉而今已矣公子瀚持史官陳  
鑑之狀泣而請銘予因慨夫老成之人漸以漸盡而尚

忍銘公哉辭弗獲按狀公諱鉉字宗器號假菴其先汴  
人有為黃州統領者宋南渡時徙建康高祖順之仕元  
為平江路權茶提領因家於蘇遂為長洲人曾祖元善  
號雪樓元末兵亂嘗率其賢豪以障鄉井里人德之祖  
德讓洪武中以明經為沛縣儒學教諭考仲輿隱德不  
仕用公貴贈徵仕郎中書舍人妣陸氏贈孺人公生彌  
月而孤數歲入鄉塾輒有志向學雖衣食粗糲弗顧也  
未冠即授徒里中從之者甚衆其言動規模如宿儒鄉



之長者皆折輩行與交性孝友母遘疾刲腕肉以進旦  
夕籲天求代比沒哀毀垂絕者再見者莫不感嘆事兄  
若嚴師雖加楚毒不敢怨迎寡姊養於家從父沒而絕  
嗣公以父命出繼之永樂戊戌以善書徵入翰林明年  
中京闈鄉試未上春闈授中書舍人宣德己酉與脩兩  
朝實錄成賜白金文綺陞兵部車駕主事仍蒞事內廷  
正統戊午與脩宣廟實錄成進翰林侍講金綺之賚有  
加正統戊辰詔擇進士穎敏者為庶吉士屬公教之公

愍曩之事虛文者慨然以師道自任俾力追古作有一  
字未愜者經月不置以故諸吉士大有所造後多以文  
學致名己巳進侍講學士景泰庚午主考京闈及揭曉  
第一人劉宣乃盧龍軍士同事者欲更之公曰朝廷立  
賢無方不可乃止時論譁之公未沒宣己第進士為翰  
林修撰矣初置經筵官公居首選數賜白金文綺寶鏐  
禮遇甚隆辛未夏不雨特遣祀濟瀆壬申春缺祭酒衆  
難其人大學士高穀曰學行老成無如劉某者遂抗章

薦之命下以公為國子祭酒士類懽然有得人之賀公  
曰士子若室女當保愛之於是定程課示教條旦暮講  
解如恐弗及有託權貴以求倖得者斥弗聽六館之士  
帖然明年養母陳氏卒朝廷欲奪其情公力求終制服  
除仍拜祭酒天順改元皇上復位念宮端必求宿德之  
儒在朝無踰公者遂陞少詹事日侍講讀輔導惟謹忽  
一日不至云已捐館矣朝紳莫不盡然上聞訃哀悼曰  
安得學行醇篤如斯人者遣禮部侍郎李紹諭祭於其

家公生洪武甲戌八月二十日卒天順戊寅十月六日  
享年六十有五公性介特絕軟媚之態立身以不欺為  
主未嘗疾言遽色尚儉約已貴而猶儼居隘陋裕如也  
祿賜之餘必分惠宗族故舊之貧者恒館粟之僚友卒  
而乏者為具後事復教其孤有至顯官者有病吏公憐  
而舍之染其疾及家人或請遣之公弗聽已而皆愈鄉  
人有逮繫不能明者公為白其冤其人廉之懷金以謝  
公曰吾直爾公也豈為私邪遂感泣而退其善行如此

類者甚多立朝無情容不以寒暑久速而少變亦其志之堅定也楊文貞文定兩公皆重其為人每稱道之家訓素嚴仲子瀚以進士使南方戒之曰見利毋苟得也閱其衣篋以行比還仍閱之如故乃喜曰無玷吾門矣平生耽嗜文籍博極羣書素有醞藉為文紆徐演迤務造至理詩古澹春容自有餘味方衆賢聚于朝以意氣相雄長公獨用心於內退然沈毅略不與較有假菴稿若干卷藏於家配陸氏有淑德封孺人子男四長曰澄

早卒次曰瀚天順丁丑進士次曰澣次曰泳女四安清  
安福安正安吉俱適士人孫男女十人卜以明年某月  
某日葬其縣武邱鄉之原從先兆也銘曰時惟雍熙氣  
乃淳固豪傑之才咸出仕路姑蘇之墟文物之鄉卓犖  
之士後先相望猗嗟劉公聞道甚早成童為師誦其長  
老六書之精應帝之徵受薦於京文為世程乃入秘書  
染翰滋久國史屢脩皇錫多有乃訓吉士乃典文衡懇  
切公正位升譽騰公為司成聿興士類其教以身展也

無愧公為唐事入佐元良其輔以道燧兮有光茲也全  
歸惟帝之恤勒銘高原永示無數

古穰集卷十三



欽定四庫全書

古穰集卷十四

明 李賢 撰

墓碑銘

中順大夫太常少卿兼翰林院侍讀贈禮部左  
侍郎謚文介劉公墓碑銘

士之所存文與行而已惜乎今之世能具是二者鮮焉  
若劉文介公其殆庶幾乎公諱儼字宣化別號時雨上

世自金陵徙江西泰和復徙吉水以儒術起家為望族  
五世祖天聲以書經授家塾宋咸淳進士弟新民繼之  
於是劉氏經學盛傳於時曰益厚曰維德曰永寧公之  
高曾祖也皆能以先業相承考原性號退菴隱居不仕  
以公貴贈奉議大夫右春坊大學士兼翰林院侍講妣  
楊氏宋屯田員外郎清之裔有淑德贈宜人生子三公  
其季也公為人端介自幼不凡勤學勵行退菴知有遠  
大志遣從族之先達時年十六七為文必主理雖脩舉

子業耻為口耳之學務探底裏嘗曰讀書豈但皮毛而已年二十四遂領鄉薦春闈中乙榜不就而還潛心林下二十六年正統壬戌乃得雋春闈廷對有鯁直忠愛之詞遂擢進士及第第一授翰林脩撰階儒林郎位既顯學益進以古文名天下八年與脩五倫書獲賞賚十一年充經筵講官賜敕命景泰初進侍講階承直郎三年遷右春坊大學士兼舊職階奉議大夫四年與脩君鑒書有白金文綺之賚五年選進士十八人為庶吉士

與狀元孫賢等屬公教之六年賜誥命是年脩寰宇通志為副總裁繼續宋元通鑑綱目公復領之七年志書成進太常少卿兼侍讀階中順大夫錫賚益厚尋主考京闈有公卿之子欲僥倖科名者公持公道落之遂誣公重罪賴學士高穀救之獲免天順改元皇上復位獎用忠良以公署翰林院事將有寵任之漸而一疾不起公天性孝友初二親垂白在堂伯兄早亡仲兄優游文翰間惟公綜理家務雖公私多故而二親安公之養及

遭親喪立見毀形凡附身附棺之事無所不用其極居  
閑教子弟務底成材有姪曰數官阜城而死公哭之歸  
櫬於鄉族人數千指稱公無間言凡窘者葬其喪貧者  
成其配寡弱者扶之得所及上春官鄉人有貸者悉焚  
其券嘗慕范文正之為人立義倉於先祠之左貯粟以  
周其乏且自為記以見志在朝言論侃侃所交必正人  
回邪者折之不少借用是直聲大振訃聞上悼惜不已  
特贈禮部左侍郎謚文介敕工部營葬事復遣官諭祭

其家嗚呼若公者斯可謂之士矣公生洪武甲戌正月十三日卒天順改元九月十二日享年六十有四配淑人王氏故翰林編脩覺非之女子男三長節次即次敕女一適錢啓明孫男存者二孫女三銘曰黃茅白葦天下紛紛孤松秀拔挺然不羣毅此劉公得氣之正浩然流行莫之敢競繫氣所發有行有文名魁天下義動士人翰苑春坊太常之署較藝編摩綽有餘裕位不滿德士論惜之才不盡用我皇恤之特進崇階載加美謚光

振廬陵羞彼千駟公行公文耿兮不磨詔爾後世銘勒  
山阿

中議大夫大理寺右少卿李公墓碑銘

公諱奎字文曜廣信弋陽人九世祖必達宋解元曾祖  
仲祥元進士祖德懋隱居不出父興祖以公貴贈監察  
御史母胡氏封太孺人公自幼好學稍長博通諸經永  
樂辛卯領鄉薦明年春闈登乙榜授湖廣黔陽教諭丁  
外艱服闋調廣東保昌宣德丙午以績最陞南京國子

監學錄訓飭造就如二廣正統丁巳用薦拜監察御史  
明年出巡浙江兼理海道時巡撫大臣及總戎貪縱不  
法即上章劾之復陳機務數事上皆嘉納已而倭寇桃  
渚朝廷知非公咎獨罪總戎辛酉春還京甲子夏復出  
巡蘇松常鎮諸郡法令嚴明吏以賊去者甚衆尤重名教  
若鄒忠公東坡龜山三先生嘗寓其地皆為祠以祀之  
楊文貞公薦公學行遂受詔督京畿學事舉儒士胡珏  
等五十人分主教導士習丕變丙寅召陞大理寺左寺



丞已已夏復受詔巡撫河南并畿內諸郡得便宜從事  
奏減真定所負官馬八千疋免河南諸府災傷田租二  
十萬石慮汴梁為中原重地請移南陽護衛軍以守之  
又慮南陽地接荆襄流民聚居者不下數十萬恐生變  
請於關隘洞口設巡檢司軍衛防禦布按兩司增叅議  
僉事二人以任撫治朝廷嘉公之策皆從之以圖書勞  
公復遣行人賚白金文綺以賜是歲冬清豐邑以妖言  
倡亂公運謀督兵悉擒捕之詔下褒獎進右少卿明年

夏廷議以去秋敵侵京畿人民驚擾不已遂移公專撫  
真定諸郡公益殫慮往來綏輯民遂安堵時諸郡久旱  
公齋沐禱於神即雨是歲大熟先是民飢公請移臨清  
倉儲三十萬石賑之民賴全活者甚衆見前代名臣宋  
璟李沆墓圯即命工修治之忠勤之績冠於一時乃遽  
遘風疾代還之日諸郡士民咸號泣挽留至京懇乞骸  
骨公卿大夫士爭為詩文重公之去未幾以子貴賜誥  
命進階中議大夫贊治尹時巡撫廣西江西憲臣聘典

文衡疏請大用公皆辭之不就築溪山風月鷗波二亭  
與親友詠觴其中重建祠堂書院以勵鄉俗教後學天  
下莫不高其行所著有詩經辨疑九川集歸田錄數十  
卷忽一日疾作乃自為祭文復書後事而卒天順改元  
三月一日也距生洪武己巳三月十四日享年六十有  
九上聞訃遣官諭祭其家邑令汪復肖公像於鄉賢祠  
以祀焉公配張氏繼陳氏皆封恭人又繼孫氏子男二  
人長玘舉進士授監察御史出為陝西按察司僉事次

璘女五人羅徽裴憲陳顯唐珏其壻也孫男四人孫女  
八人族孫曰良復為監察御史其餘顯宦者又數人銘  
曰維政與教鮮克兼舉有美李公慨然自許始攜一經  
于嶺于湘于彼成均頌聲洋洋受薦而興執國之憲董  
學于京士習丕變受帝之命王事有程于浙于汴惠流  
威行南北畿民見公咸喜聞公之歸攀號不已晚節令  
終有子希蹤政教之臣孰如李公祠並鄉賢哀動宸極  
我銘其藏過者必式

中奉大夫太常寺卿夏公墓碑銘

公姓夏氏諱衡字以平樗菴其別號也松江華亭人曾  
祖福隱居不仕祖彥容考宗文俱以公貴贈亞中大夫  
太僕寺卿祖妣顧氏妣鄭氏俱贈淑人公自幼端謹不  
羣永樂初選為郡庠弟子員力學不怠己亥以善書徵  
入翰林脩永樂大典越三年辛丑書成擢中書舍人壬  
寅扈從文廟北征洪熙初仁廟授以敕命階徵仕郎賜  
第宅一區凡內閣制勅文字屬公書之公夙夜謹慎大

得時譽宣德改元扈從宣廟征武定州公能周密文事  
諸老先生咸倚重之師還賜畔者家屬四人明年丁未  
上念公勞勩特陞行在吏部考功員外郎未幾陞郎中  
供職如舊公益感激盡心嘗曰吾幸居此清切之地敢  
不知所重乎明年夏以預脩兩朝實錄成加祿一級且  
有白金文綺楮幣之賚又明年授誥命階奉政大夫正  
統初英廟賜公織金衣一襲尋以清脩文雅為楊文貞  
公所推入侍經筵而白金綵幣之賚尤厚是歲丁內艱

上命兵部給舟送其櫬還鄉安葬聞公哀毀骨立又遣太監范安賫瓊玉膏賜之服闋供職惟謹癸亥秋以秩滿陞順天府丞己巳秋朝廷有事以公勞於文墨進陞太僕寺卿賜白金文綺楮幣三年復授誥命階中順大夫天順改元英廟復位進陞太常寺卿復有白金文綺楮幣之賚癸未公以年踰七十無子懇乞致仕自顧孑然一身托其壻翰林譯字官王臣以老焉天順甲申十月十七日以疾卒距生洪武壬申十二月十一日享年

七十有三公天性孝友襟度和易少與伯兄桂軒先生  
自相師友居官四十餘年曾無過舉俸祿之餘多濟貧  
乏所賜僮奴不勞以事惟使之應門而己有貧民韓五  
典屋以居久之自構數間己而五卒鄰豪欺其孤寡欲  
攘其居公為奏請仍歸韓氏母子內姪顧廷玉遺孤本  
無依公憐之訓習法書薦入翰林擢中書舍人復出資  
擇婚而配之嘗以俸金二十餘兩托寄南京禮部郎中  
金汝礪為盜所竊償之不納曰是不以其道得之者何



償之有士大夫咸以長者稱之公平生善吟詠至於字  
學真行隸篆無不精美尤善作山水竹石四方來求者  
甚廣得之者咸寶愛焉所著楞菴集若干卷藏於家配  
顏氏贈淑人生女一壻即臣也卒之日朝廷遣官諭祭  
復令有司為營葬事銘曰造物冥冥孰云可測善惡之  
應未必皆獲溫溫夏公惟善是行乃絕其嗣聞者愴情  
公在仕途惟勤惟慎館閣周旋芳聲屢振以德觀之裕  
後可期夫何乖焉在理不宜匪曰不宜亦云有變變而

不常於人何譴是以君子求無愧焉曰常曰變一聽於  
天嗚呼夏公名稱在世不以無後廼有或替為述其事  
勒石墓前以詔鄉人以永其傳

通議大夫湖廣按察使馮君墓碑銘

正統初予識馮君至誠於京師固已藏之胸中矣既而  
數歷中外功名事業過人遠甚予固知其必至是也今  
即世五年矣其子謨始克狀君之行乞余為銘予辭以  
不暇而請之不置也則序而銘之序曰君諱誠字至誠

別號無偽道人漢車騎將軍唐之後有諱給者仕宋為吏部侍郎始居饒之浮梁曾祖良輔隱德不仕祖夫志元末大儒也洪武中應聘至南京以疾辭歸父溪翁以明經教授鄉人叅政黃勉辟之不起娶張氏生子四人君行三也自幼聰敏為諸生力學不懈弱冠以詩經領永樂庚子鄉薦明年登進士第賜歸進學慨然曰吾聞古人顧名思義因號無偽道人識者曰此遠大器也又明年赴召授廣之香山知縣君便道至家曰吾有祿可

養親矣乃盡讓田產於昆季奉二親以行香山邑素陋君以禮教變其習邑人始易君年少已而皆心服之有虎為患君曰人與神分職以治民使其冥然不靈何以享明祀乃移文城隍之神虎遂渡海北去朝廷用兵交趾檄君備軍饟甚急役夫在道感君恩信無後期者久之二親相繼以沒君哀毀不勝扶柩還葬一用朱氏禮且建祠堂脩譜牒以倡族人服闋吏部委君理蘇松諸郡工役之隱漏者事竣調徽之祁門君益勞心民事未

幾用薦授湖廣道監察御史正統丁巳奉命出巡貴州  
軍民利病悉條奏以聞辨明冤獄前後數十已未復巡  
陝西值歲大歉即檄有司發倉廩以賑復奏停賦稅鹽  
糧以實邊困民困乃蘇又劾閫帥之貪殘者壬戌麓川  
夷梗化分遣憲臣發兵往征之君發四川兵盡得其精  
銳還授敕進階文林郎復用薦陞浙江按察司副使時  
憲使軒輓用法甚嚴每有疑獄多從君辨嘗與御史譏  
兩浙獄囚君平反甚衆處州賊起宣慈之黨尤衆兩浙

騷然巡撫憲臣議捕之衆皆憚往君曰食君之祿而避其事可乎毅然請行至則遣健者潛入賊中啖以金帛賊謀寢衰乃大饗兵士掩其未備一鼓而敗之殲其渠魁散其脅從單騎巡勞民皆安堵先是民有謠云若要宣慈破除是馮君過至是驗焉朝廷嘉其功進陞湖廣按察司浙民間之遮道乞留不獲乃大書其事饒諸崖石君至湖廣訟牒紛積囹圄充斥乃晝夜省閱而斷遣之滯獄為之一清湖南夷獠告訐之風頓息都御史劉

廣衡奉敕糾察湖廣庶官乃疏君政績第一朝廷賜誥  
旌之進階通議大夫推恩二代祖父皆贈官如君妣皆  
淑人君益思自力以答主眷未幾坐微累逮繫朝廷知  
其誣即遣還任踰數月疾作猶治事如常未嘗就枕一  
日諸孫侍側君忽語之曰歸語汝父奉法循理勿忝所  
生言訖而逝時天順己卯四月二日也距生洪武庚辰  
四月二十五日享年六十藩閭官僚哭之盡哀湖之南北  
數月猶聞行哭聲德之感人其深也如此君天性忠厚

襟度坦夷不輕為喜怒其處事也據理為是非其用刑也原情為輕重僚友無不嘆服者平居手不釋卷所著詩文有真齋集若干卷藏於家配閔氏累封淑人子男二人長曰韶次即謫登景泰甲戌進士第為平湖知縣有政聲孫男六人孫女二人以卒之歲某月某日葬於邑之豐村烏龍之原從吉兆也銘曰嗟嗟馮君發跡江右碩學宏才世豈多有始為邑令于廣于徽受薦而起民曰疇依入官烏臺士類咸喜南徼西陲大振風紀佐



梟於浙叛寇以殲遂持憲節聲震湖南仕路翺翔餘四十載一節始終曾莫之改古人芳躅孰允蹈之相彼馮公實克造之身雖云亡功則甚偉我銘其藏令譽無已

墓碣銘

武德將軍烏撒衛正千戶孔侯墓碣銘

侯諱顯姓孔氏系出宣聖之後傳派疎遠莫稽其詳先世有徙淮甸者居鳳陽之靈璧遂為其邑人侯早以茂材仕元至山東行樞密院判時元綱不振羣盜蠭起侯

守沛城我太祖高皇帝起兵定天下丙午年夏四月遣  
偏將陸叅政取徐州侯遂歸附吳元年春充宿衛夏六  
月授兵馬指揮分巡金川驛橋冬十月改金吾右衛鎮  
撫洪武改元夏四月授武略將軍賜誥命侯累扈從南  
北征討二年秋上聞鄧州自元將實喇巴圖攻而克之  
燬其城無居守者二十餘年冬十一月乃命侯提兵五  
十人來治是州侯抵襄陽詢鄧之流寓者導至故址於  
是冒霜露披荆棘收集散亡興舉廢墜規為新城三年

冬十一月上聞侯治狀賜誥命四年夏城成公私屋宇  
亦完市井募布人多來歸是冬驗版籍得軍士千餘人  
編民千有七百餘戶五年內鄉山盜起侯率所部兵往  
捕之盡上嘉侯之功遣官賚龍彩紵衣一襲六年秋七  
月復念侯效勞陞正千戶專理戎事不煩州政益優之  
也九月授武德將軍賜誥命侯與其副益綜理經營以  
壯樓觀以浚濠池明禁耀武四境晏然十年十一月上  
復念侯之功賜世襲誥命侯在職不懈每欲足食足兵

闢四野脩陂堰民稱易治復如古昔十七年春正月侯  
鑄雲版為晨暮節有無賴者誣之遂逮侯夏四月獲宥  
調貴州烏撒衛侯即怡然起任二十九年夏五月以有  
疾引年請以兵付其長子乃歸老於鄧鄧人敬愛之加  
於在仕時新城之南建宅一區日課子孫農擇其秀者  
延師於塾訓成之時徜徉容與於別墅山水之間見者  
不知其為故將也一日忽嬰疾畢集親族慨然曰人生  
於世與朝露何異死生常理固不足介意所貴者有善

可稱而名不泯焉爾吾昔受天子命來治此州於兵燹之餘故城榛莽為虎狼麋鹿之所賴兵民之力而城之使名郡不減於昔吾死不憾矣言訖而逝侯生於元某年某月某日卒於大明永樂某年某月某日享壽若干曾祖某祖某父某母某氏配李氏子男四人長著襲正千戶次藝次某次景女若干人長適某次適某孫男若干人長安襲正千戶次文行忠信溫良恭儉讓某某某某俱有恒產不墜侯業孫女若干人卜葬在新城乾隅湍

河之北文之妻李氏賢女兄也通家之義不可以不銘  
銘曰煌煌大明致時之亨開拓疆宇四方底平桓桓孔  
侯攀龍附鳳仗劍驅馳躬頻扈從鄧為荒州餘二十年  
宸衷軫念簡任才賢毅此孔侯受帝之命手握兵權兼  
彼庶政翼翼新城載經載營惟侯之功不日而成遺黎  
乃來事我南畝足食足兵惟此賢守襄漢之南名郡再  
興惟藩惟翰以慰聖情誤玷青蠅蠻邦戾止皓首來歸  
鄧人咸喜相古朱君葬祀桐鄉任丘名城亦有中郎孔

侯配之有美無忝湍河之藏無伐無翦我作銘詩刻石  
墓門奕世簪纓惟侯子孫

翰林院檢討從仕郎鄒君墓碣銘

唐李王審知稱閩王中原之士多歸之若河南固始鄒  
勇夫其一也勇夫以僕射鎮歸化因家焉歸化即今泰  
寧縣是後子孫繁衍衣冠不乏若令懼為唐水部員外  
郎長孺為宋太學錄曰應麟曰應博俱登進士第曰應  
龍以慶元二年狀元至端明殿學士簽書樞密院事贈

少保其族益大顯今翰林檢討君諱安其後也君曾祖  
光號東軒祖林甫號樵隱考世榮贈翰林檢討母朱氏  
封孺人君自幼穎敏不凡書過目即成誦善屬對世榮  
與故人江飲江屢出奇語欲屈之見其略不締思隨應  
如響乃嘆服曰吾兒素稱能句輸爾一籌矣甫辟為邑  
庠弟子員令尹見而奇之洎冠字仕恭益自奮勵凡經  
史靡不涉獵尤專於易永樂辛卯遂中鄉科明年中春  
官乙榜得教諭浙之新昌或曰是邑乏科久矣奈何君



曰何地不生材顧教之者何如耳至學召諸生前曰吾受天子命來教爾輩務底成材效用於時若見從乎咸曰諾於是立程課嚴教條雖隆寒盛暑不少輟始有不堪者搖以浮言終則翕然從之故一科而舉者五人再舉者三人若楊信民甄完諸輩為都憲為方伯者彬彬相繼時論偉之君歷典京浙文衡士類服其公嘗考績赴京遇燈節獻詩文廟嘉之賜寶鏐尋有以君學行老成者薦擢國子學錄會宣廟親平沙漠君獻頌有椰子

內醞之錫繼賀騶虞元免嘉禾卿雲諸祥多獲賚予九載進秩助教再進檢討天下英才皆卒業其門正統九年春上視太學君蒙勅諭賜衣一襲東軒以幼孤育外族為王姓已三世君慨然念水木本源之義抗章於朝復鄒姓又念王氏不可絕仍以兩兄嗣之未幾以引年乞致仕自大司成以下暨六館之士與朝紳知舊祖餞都門外見者莫不歎息以為復見二疏既歸深衣幅巾徜徉山水間訓諸孫禁侈靡之習宗族鄉黨咸樂從之

為詩文必法古人才識豪邁有氣節求之者接踵於門  
所著管窺集易講義若干卷尤愛寫竹梅蘭菊山水禽  
鳥之類得趣一揮極其工緻士大夫爭尚之數歷中外  
四十年踐履篤實始終如一可謂當代之醇儒矣君生  
洪武辛酉正月三日卒天順改元五月八日享年七十  
有七配蕭氏封孺人子男三長允崇次允隆舉進士官  
太僕寺丞次允升女一孫男十孫女一曾孫二以天順  
二年某月某日葬某山之原銘曰師道之立自昔為難

猗嗟鄒公終老儒冠邑校成均傳道解惑孰出公門都  
憲方伯仕優而學紹古作程華國之文洋洋頌聲庭訓  
有嚴濟其世美我銘其藏百世無毀

處士崔君墓碣銘

處士崔君往歲以子富為吾州來京師謁予因識其人  
於今殆十霜矣忽以疾捐館富聞訃悲號奔喪既葬狀  
其行走予泣請銘其墓上之石予嘗識處士固宜銘况  
重其子之為名守乎處士諱政字以德世居薊州巫山

知縣文憲之孫清河巡檢恕之子也處士早孤母張氏  
鞠之既長能力農以致恒產人或諷之曰以子之才游  
庠序取青紫如拾地芥耳何憚不為處士謝曰孤不幸  
早失怙賴母氏撫育至有今日罔極之恩惟終養圖報而  
已安能捨膝下之奉而干祿仕乎況出處有命不可幸  
致也假使造物有意付之子孫亦不為晚鄉人聞而肆  
之於是一力事母務盡其情庶幾古所謂孝弟力田者  
平居朴淡自適不事華奢好施予聞鄉人竇氏之風慕

之曰使吾有千金之貲必繼其蹤自是度其衣食之餘  
盡賙貧乏錙銖不遺既遣富入州庠訓勵諄諄曰爾上  
世官業不可墜也富奉教惟謹遂起貢士知鄧州則又  
馳書戒曰汝在官俸祿之外一毫無取於人異日行李  
蕭然而歸方是孝子用是富在官冰蘖之聲大振處士  
生洪武己卯正月十六日卒天順戊寅九月二十三日  
配張氏子男四長即富也次曰宣次曰寧次曰宏孫男  
五孫女二葬以是歲十二月二十八日墓在州東鳳凰

山之麓銘曰身不求貴而不失其貴者孝以事親而天爵存其衷也行不求名而不失其名者義以訓子而人爵在其躬也况景仰哲人而允蹈其善踪者乎宜慶澤之流方殷而未窮也銘以勒石潛德具彰嗚呼寔寔將無憾於深藏

處士許君墓碣銘

承族之微由己著之必其善行出於尋常否則未必能之也承族之著由己微之必其惡行下於尋常否則未

必若是也以此論之曰著曰微是皆有以致之者若處士許君士榮殆所謂由微而著者乎處士世居杭之仁和其童卅時已失怙恃孑然孤弱無彌月之儲人不堪其憂而處士能勉自樹立殷勤治生不數年遂有恒產日益月盛家用以饒鄉之右族罕與儷者嘗自嘆曰家門衰替之餘不自意其享有今日然力能致富不過陶朱猗頓之流耳吾聞君子所貴乎富者以其能好禮也於是奮志力學日考德問業於章縫牧校翼翼然不少



怠且痛自刻厲行已待人一以謙卑自牧而橫逆之來亦惟以自反為主因號容菴以見意又悟積而能散之義以施與為樂里有匱乏者每每賙給之不厭正統間值歲歉邑人大飢有司賑之不能徧處士慨然曰鄉人多餒而吾獨飽可乎遂出穀五百石以助官凡通衢甃甃歲久而壞與夫祠宇橋梁之弊者處士悉出財脩治之處士為人襟度瀟灑雅愛清致所居隙地濬為池沼植以芙蕖壘石為山嘉卉美木駢羅其上暇日延搢紳

之士觴詠其間時誦邵康節四太平世之言曰吾其庶幾乎幼子曰傑性穎敏遣為學諸生處士每程其業而策勵之歲庚午乃領鄉薦登太學天順改元選擢監察御史將有封命之榮而處士一疾不起矣享年七十有二洪武丁卯其始生之年也娶同邑鮑氏女凡處士起家皆藉以內助而恒以不逮侍舅姑為恨歲時祀事必躬必親待族黨禮意周洽撫諸子慈而能教每處士有所施與必欣然順之無吝意洎處士屬纊驚惶悲感同

日而沒鄉閭莫不嘆異享年七十有四生子四人長曰  
誠次瑛次俊次即傑女二長在室次適丁勉孫男六人  
孫女五人嗚呼處士之家自微而著者如此其善行豈  
可使之泯泯無傳哉銘曰成家之難譬之升天家聲復  
振在彼後賢矢心不渝乃有恒產孰將挽之流俗渙  
湲乘衰之極遂熾而豐鄉有巨室莫之敢雄君也奮然思  
進於學譬之鳴蟬脫此汙濁我既盈矣將之以謙犯而  
不校匪涼匪炎解橐周貧曾不少倦匪恤人言行我之

善優游暮景家以大成適情山水用畢此生有美一郎  
登庸烏府蘭玉蓁蓁以篤純祐高壽全歸復何憾焉矧  
與良配同此逝川峨峨礪松挺出茅葦我為銘辭永昭  
二美

古穰集卷十四

欽定四庫全書

古穰集卷十五

明 李賢 撰

墓表

贈御用監太監阮公墓表

公姓阮諱浪世家交趾永樂中太宗皇帝因安南作亂遣將征之衆悉歸附時公甫十餘歲特俊爽被選入掖庭太宗見而奇之冀成其才命讀書於內館公穎敏好

學孜孜不倦遂博通羣書頡頏儒者然德性淳篤能以禮自持與物無競輩行莫不折已加敬焉用是太宗命理尚衣監事公益敬謹小心克勤所事洎侍仁宗尤愛其才將有寵任之漸宣宗初遂擢奉御俾掌寶鈔司時官軍直禁衛者宜置金牌特委公督治事不日而完宣德三年西洋諸國進御船抵廣南有司馳報宣宗以為封堵寶物必得其人命公馳往處置周密而還所歷秋毫無犯宣宗甚喜賞賚殊厚五年宣宗念敵人弗率親

帥六師出塞以振威武公扈征有功陞御用監右丞正  
統改元之初今上以公為先朝舊臣多效勞勩特陞左  
少監侍上十有五年恭慎不懈如一日及上居南宮公  
復以老成端謹入侍左右事無大小悉咨委之時景泰  
已易太子奸臣覬圖爵賞構辭加害言公欲糾衆復立  
正統又欲公旁引內外勛舊羅織成狀百端拷掠雖極  
其慘毒未肯承服遂忍恨而死終不累人聞者莫不酸  
辛嗚呼公能之死不變以息內外勛舊之禍視古之剖

心明誣者亦何讓哉公生於洪武某年九月九日卒於景泰三年七月十二日春秋若干今皇上復位改元天順首誅奸惡而深悼公之誣枉特贈公御用監太監賜以秘器如禮斂之復令所司擇地為營塚壙遣官諭祭以妥其靈公雖弗克享高爵於生前而所以表公之節白公之心傷公之亡寵眷已極則公之死不為徒死所謂有重於泰山者也司設監丞賈公安猶慮公之行實未盡暴於世屬子為表刻石墓道以示不朽云



資善大夫吏部左侍郎俞公墓表

竊怪夫世之人見害必避見利必趨已而避害者得害趨利者失利大抵不知命者也若夫知命者遵道而行盡其在已人謂蹈害而利反至焉人謂失利而害莫侵焉豈非明哲之士哉今之士效用於世能若是者其惟俞公乎公諱山字積之別號梅莊先世居汴有仕宋者扈蹕南渡因占籍嘉興遂為秀水人高祖瑞卿曾祖禮之俱不仕祖伯綱父璿俱不幸坐累遷戍而死人咸惜

之後以公貴俱累贈資善大夫太子少傅兼吏部左侍郎妣王氏鄉先生達道之女累封太夫人公生而岐嶷風骨秀爽志趣不凡達道見而異之曰俞氏之昌其在茲乎遂妻以子弱冠補郡庠生治春秋從西園李先生講學專業不懈至忘寢食踰年即得其奧義永樂癸卯領鄉薦以祖妣周氏垂老不忍去左右就養者三載宣德丁未乃入太學時祭酒四明陳先生師道尊嚴慎許可六館之士肅然惟待公以色庚戌春遂中乙榜人或

諷之曰以子之才乃屑就邪公曰命也不可強遂得蘓  
之崑山訓導崑山之士樂公善教莫不爭先奮勵底于  
成俄丁外艱諸生攀留弗克有隨之抵家受業者正統  
丙辰服闋調常之宜興時公之執友楊氏適主師席遂  
同心率教士習丕變未幾丁祖母憂宜興之士思之不  
置爭詣提學御史留之弗果正統庚申服除赴京時朝  
廷嚴勅吏部擇儒官以輔親藩人皆托故避之公曰自  
有定數吾何避為遂選擢郕王府伴讀公既居是職若

將終身日勤講說不少輟祿微數窘畧不芥意弟子從  
游者益衆慕求公之文者接踵於門正統己巳景泰即  
位進公鴻臚左寺丞時都御史楊善掌寺事雅重公薦  
陞左少卿踰月拜吏部右侍郎賜誥命階嘉議大夫尋  
轉左侍郎壬申進兼太子少傅復賜誥命階資善大夫  
久之忽嬰風疾朝廷屢遣太醫往視後少愈景泰乙亥  
乃上疏乞骸骨不許且慰留之踰年請之益切人或謂  
曰委任方隆疾以漸瘥何苦欲休公曰隆替相尋亦理

之常吾非不戀明時揣分宜休況以疾乎復上疏懇辭  
朝廷重違其意特允其請賚與甚厚俾乘驛舟以歸別  
之日公卿大夫設祖帳都門外觀者如堵莫不嗟嘆曰  
于今復見古人矣既歸越數歲舊疾復作竟弗起公生  
于洪武己卯六月四日卒于天順改元十月九日享年  
五十有九卜葬嘉興永豐鄉之原所著梅莊集若干卷  
藏于家配沈氏累封夫人生男三長曰謨次曰誥工科  
給事中改判究之沂州次曰諫女一未笄而沒孫男三

孫女二公為人敦厚簡靜於勢利澹如也在藩邸時嘗  
衍義經書纂成講章尤善諷諫屢有裨益及顯用之日  
持以正大守以清謹不市私恩不取容悅人皆知為君  
子人也景泰初議迎復之禮公奮然曰鑾輿回則人心  
安力贊其成言官有持正被嫉者公曲為調護竟致顯  
用其佐銓衡也人才多所拔用未嘗自言曰薦賢為國  
豈為私也噫公之行藏不避害不趨利已而未嘗有害  
吉無不利者如此雖晉於壽而立心制行之高俯仰無

愧足以暴白於天下後世矣

通議大夫兵部右侍郎宋公墓表

有衰絰而深墨其容者造子云自南京來泣且告曰孤之父先生故人也屬纊時謂孤曰表吾墓者必屬先生孤敢奉遺命以請子悲其意不忍辭按侍郎俞宗立狀公諱琰字廷珪拙菴其別號也系出唐廣平文貞公之後世居邢州之南和唐末有為浙之奉化令者因土著焉詩禮相承歷宋元弗替曾祖起潛為元鄧山書院山

長方國珍據四明即歸隱祖允宜性勤學尤喜成才為塾以教鄉族子弟有遺規焉父諱原亮人稱竹軒先生而祖與父俱以公貴贈通議大夫兵部右侍郎祖妣蔣氏妣朱氏俱贈淑人公生於洪武壬申二月二日自幼穎敏甫六歲讀書日記千百言遂能吟詠得句甚奇鄉先達嘆異之永樂初為邑庠生益肆其力淹貫經學旁通子史凡陰陽歷數卜筮相法咸造其精字書遒勁不下古人年十七遭母喪哀毀過禮時弟琬甫四歲抱養



惟勤不貽憂於父居鄉勇於行義時疫大作姑家尤甚  
人皆遠避無至門者公曰若此噍類絕矣患難不恤何  
以親為遂宿其家躬治湯藥以全活之卒者出地塋之  
鄉閭為之感化永樂乙未乃登進士第選為翰林庶吉  
士預脩性理大全書未幾仁宗皇帝以太子監國南京  
選公隨侍既而太宗皇帝知公之才復召還北京預脩  
永樂大典書成賜白金文綺授中書舍人涖事翰林仁  
宗嗣位之初特賜勅命階徵仕郎宣宗皇帝御極遷禮

部儀制主事仍涖翰林事宜德庚戌以親老懇陳歸省未閱月復遣使召還正統改元皇上嗣位特選公入史館纂脩宣宗實錄未幾遭外艱痛踊幾絕四年秋服闋至京上以公累朝舊臣轉吏部考功主事日侍禁庭凡中貴人幼而秀者屬公訓之公雖被寵光達盛衰之理益畏慎不安屢乞外補或曰如公遭遇千載一時搢紳所願不可得者何乃自疎如此公曰以吾所見當如是古人固有不俟終日者九年春遂遷河南布政司右叅

政時汝陽不雨禾將稿蝗復大出官民憂懼走報藩司  
公大驚曰尚可緩乎即日往視之且自訟曰匹夫一念  
之誠尚能格天况吾任承宣之職乃齋嚴致禱方畢民  
忽報云有鳥數千成陣而下延頸長足名曰禿鶯啄蝗  
無遺已而飛去越明日大雨官吏士民交相忻忭景泰  
四年冬以考績來京轉太僕寺卿尋遷兵部右侍郎公  
益勵忠勤士林推重未幾賜誥命進通議大夫天順改  
元上念南京根本重地以公老成往蒞部事越三月以

疾卒于官是年七月四日也壽六十有四配李氏前禮部尚書兼左春坊大學士志剛之女先卒贈淑人繼室同邑竺氏女封淑人亦先卒側室孫氏金氏生男二長曰旻次曰晏女慈恩適王績餘早卒孫男二俱幼旻等將卜歸墓于嶺山之陽公雅性不喜喧囂嘗扁退公之所曰靜齋書八詠以自況時重公之文求者接踵所著拙菴集若干卷沒之日有司奏報上深悼之特遣官諭祭仍命工部為營塚壙嗚呼公之見用于世慎終如始

愛惜名節無纖毫之玷置之名卿才大夫之列無愧焉  
是宜有永于後矣

奉直大夫尚寶司少卿袁公墓表

士生天地間有遭遇明時而不得見用於世者有見用  
於世而不得見知於君者有見知於君而無才術以顯  
其名者有名雖顯而不能保全始終福壽俱隆者今之  
君子兼而有之者吾於尚寶袁公見之嗚呼休哉公諱  
忠徹別號靜思前人世居南昌至七世祖子誠仕宋累

官刑部尚書南渡時扈蹕家於鄞六世祖芳為吉州泰和令高祖鏞咸淳進士為宋死節曾祖澤民養道不仕祖士元為元翰林國史院檢閱官父珙國朝太常寺丞贈中順大夫太常寺少卿母倪氏封恭人公自幼穎敏神氣異常讀書強記童卯時已能詩文凡名士鉅儒一見知為大器太常君精於風鑒公得其傳文廟在潛邸時聞太常君名以書幣召之公隨侍文廟見公論相大喜賞賚甚厚尋許歸家未幾高廟崩建文嗣位信任非

人猜忌宗室文廟不安因有靖難志召公問之對曰天命有在誰能禦之奉命纂人衆大成書以獻賚予有加壬午夏文廟入正大統首遣使召公父子至官其父太常丞且曰忠徹臨事有斷制所言多驗特授鴻臚序班賞賚殊厚公入謝曰陛下當畏天脩德偃武崇文率由舊章振肅綱紀撙節財用明慎賞罰禮貌大臣黜陟臧否用臻太平之治並賜嘉納尋知公在戎籍即令兵部蠲之又嘗勉公進學公以務冗對遂陞尚寶司丞且曰

此職有暇可親詩書公退而感激不怠庚申改中書舍人已丑春營北京公扈從既至日與大議復遣中使召太常君至父子相隨出入禁庭尋密遣公乘傳看楚王子重瞳公還奏無他異庚寅春以公父高年優賚遣還公扈從北征既還上屏左右從容密問大臣優劣之狀武臣丘福朱能張輔李遠陳懋柳升薛祿文臣姚廣孝夏原吉蹇義金忠吳中呂震李慶方賓公一一論斷以對上曰卿所識鑒正合朕意是歲冬太常君卒賻葬加



厚公奔喪葬畢詔起復之癸巳春扈從至北京甲午春復扈征衛喇特乙未夏上謂公曰東宮不聞教子對曰臣聞古者不親教子宜選文學老成之人以輔導之責其成遂選儒臣儀智陳山等日侍講讀丙申春秋滿復尚寶司丞特加賞賚戊戌春召公至便殿示以進陞之意公固辭以父未有贈官即日召吏部贈其父官賜誥命公益感勵進相書機要丙子陞尚寶司少卿恩典稠疊莫與為比壬寅春扈從北征公言利出東路上不從洎

還軍在東者果大獲復觀將兵者得利已而捷至每從  
征所言無不驗者仁廟登極待之尤厚賜誥命尋賜還  
家燎黃省視宣廟嗣位召至京宣德改元丁內艱不獲  
奔喪詔以從子代還襄事一日見上容色曰宗室人有  
謀上之意七日內果有報漢王反狀者公扈從往征之  
既還受賚彌厚甲寅春得展祭之請乙卯春今上嗣位  
公入朝已未夏懇乞致政既得請南歸傾朝縉紳祖餞  
都門外公之術奇驗於文廟者不能盡述若公效忠謹

論則人不及知者甚多如終大孝之情而慎密機事論  
養賢之實而贍其取給乞賜孔氏玉軸之誥歷言遣使  
取寶之非議武職宜准終喪諫服藥勿信方士如此之  
類皆有人所難者休官居閑二十餘年忽遘疾顧其子  
曰死生常理吾何憾惟信誠忠厚可以立身汝宜勉之  
屏藥端坐而終公生于洪武丙辰十一月七日卒于天  
順戊寅三月三日壽八十有三娶邊氏累封宜人先公  
二年卒子男二長應麟早沒次應驤鴻臚寺序班女七

長適泰寧侯子陳鏞次適都轉運鹽使金達次適光祿  
寺卿子井醴次適寧波衛指揮萬全次適行人司副金  
亮次適昌國衛指揮武鉅次適王迥孫男女各二應驤  
將以某年某月某日與宜人合墓于前畧山之側前期  
奉狀以治命來請表其墓公為人慷慨有大志不隨流  
俗正論毅然不以利害少沮與人交洞見肺腑不立町  
畦見人患難惻然力援傾囊不惜理有不直者面折不  
少借其致政也聞朝廷出令之善用人之當則躍然而

喜有不便於民者必憂形於色此其為人豈特風鑒一事可稱道哉所著鳳池吟藁符臺外集若干卷

贈嘉議大夫戶部右侍郎薛公墓表

有自無為來者曰薛氏之子傳父遠命曰先公行實願托執事之文以不朽予憐其用情不以辭按其僚友翁君世資狀公諱能字士能姓薛氏世家廬之無為州有仕元為鎮撫諱景仁公之曾祖也娶李氏有隱士諱舜卿公之祖也娶顧氏考諱祥有智勇知元祚將終必有

真主者出歲乙未聞太祖高皇帝龍飛淮甸慨然提戈  
集鄉兵歸附已而從征渡江屢獲奇功授水寨管軍鎮  
撫明年克臺城己亥攻安慶洪武改元為漕運使轉輸軍  
餉進工部尚書出為北平布政使後罷中書陞六部復  
召為尚書時公已成立隨侍克盡孝敬歲辛酉尚書以  
事下獄卒公之兄覲坐逮謫戍廣東之海南公倉忙中  
獨承喪事奉尚書柩啓壙與母夫人賀氏合葬都城之  
南既襄事扶攜老稚跋涉萬里抵瓊州備嘗艱苦不以

為勞顧兄在尺籍乃經營家務以佐之而脩德善行不  
荒僻貧賤易其心嘗扁其齋居曰敬脩以見志翰林學  
士解縉聞而嘉之為作記處他昆弟間友愛篤至交賢  
士大夫久而益敬命諸子從事詩書嘗戒之曰先君當  
擾攘之際奮自武功歷官中外活人甚衆而子孫播遷  
海外庸知造物者非玉成邪汝輩勉之忽一疾不起宣  
德丙午四月十七日也距生元至正庚子二月四日享  
年六十有七瓊之儒輩私謚曰靖安處士卜塋于瓊以

子遠貴累贈嘉議大夫戶部右侍郎娶歐陽氏有淑行  
早卒累贈淑人繼娶沈氏累封太淑人佐夫起家一力  
勤儉既遠登進士第擢戶部主事歷郎中侍郎祿養之  
餘悉以散之族衆遠數遣人迎養太淑人憚於跋涉第  
慰遠曰汝雖不在膝下吾心安矣天順二年七月二十  
七日卒享年八十有四生子男五長繼善次繼隆次繼  
常次繼昇俱早卒次即遠女二長適汪鏞次適訓導唐  
虔孫男四太淑人訃聞于朝遣官諭祭復勅有司為營



葬事遠乞迎新柩合葬故里復給之驛舟以行皆特恩也系以辭曰前有尚書後有侍郎公雖韜晦益振其光靖安之名嘉議之贈公雖云亡孰掩其盛首邱之義子克成之我表其墓百世之恩

中憲大夫湖廣按察司副使彭公墓表

太常少卿兼翰林學士彭君時狀其叔父慎菴先生之行以示賢曰先叔平生存心制行之高不可以無述冀執事為表刻諸墓以示我後人賢固辭弗獲則按狀而

書之公諱琬字毓敬其先鄱陽人宋哲宗時有諱忠泰者官於吉之安福子孫因家焉代有顯宦若廉訪使仕益轉運使國祥其表表者至諱六有為國子生未釋褐而宋亡遂隱不仕子孫相戒終元之世無顯者公之高祖祥翁曾祖芳遠祖古清父欽樂皆業儒欽樂用公貴累贈奉政大夫脩正庶尹廣東按察司僉事母李氏累封太宜人生子六公行三自幼卓秀受業於古廡退山先生蚤有時譽永樂甲午首領鄉薦戊戌春登進士第

觀政憲臺時營建京城大臣以公才可集事奏委督起  
應天諸郡夫役有司服其廉令出無敢後期者吏受賄  
者置于法夫道亡者當械公以誠感之曰能自首者免  
於是首者十八九漂水有虞真者素以財力自雄為梗  
公列其惡狀真計窮而出公曰爾所以安於豐產者皆  
君上之賜也獨不知報邪真叩首愧服自後無敢亡者  
明年以山東夫役緩於運木復委公督之令甚嚴衆為  
公危公如期而還時侍郎李友直統其事嘉公之能而

延譽之公之名益著明年冬以親民職重擢公知政和縣御史李案時巡銀場懼公不容其家人奸利乃文致其罪謫徒沛中公處之泰然自得洪熙改元用薦者授臨清教諭乃作新士習具有程法諸生莫不悅服感激奮勵多底成才公在師席凡三典文衡楊文貞公高其學行薦陞翰林院編脩公曰是職不易稱也益力學忘倦雖空匱不恤預脩五倫書及宣廟實錄同事者服其精勤正統改元賜勅命進文林郎時朝廷留意人材乃

簡儒臣學行淳正者十三人授以憲職提督天下學校  
公與選中陞廣東按察司僉事既蒞任立教條嚴考課  
歲歷郡邑開導諸生凡黌舍廢缺者增脩二十餘所書  
籍不備者咸刻而傳之嶺南士風為之丕變科目之盛  
幾於中州復兼督農桑黜陟官屬奉法不撓人服其公  
朝廷嘉之賜誥命進奉政大夫脩正庶尹尋陞山西按  
察司副使仍理學事景泰初罷提學改任湖廣奉勅贊  
理廣西軍務公益孜孜盡職不憚勞涉未幾引疾致仕

太宜人猶在堂公得奉歡膝下已而居喪營塋一遵家禮處兄弟間尤篤於友愛恒欲相接怡怡如也立義塾以訓子弟暇則徜徉山水間自謂無樂以易之如是者五六年忽疾作不能言昇至正寢精神不亂意欲永訣乃秉筆以書有曰內不見已外不見人又曰保躬全歸始終不移書畢而逝天順戊寅六月二十七日也距生洪武辛未十一月十日享年六十有八配劉氏累封宜人先公卒側室周氏生子一人晉早卒女三人長適歐

陽和次適管驥次適伍塘晉之卒也無後公命時之仲  
予頤為之後孫女一卜塋于故里黃牛嶺之陽公為人  
剛毅嚴肅雖燕居無惰容然孝友忠厚出於天性接人  
意誠而禮至尤謹於奉祀先塋在四遠者歲躬展省平  
居言論一出於正義有不合雖小不為所當為者雖違  
俗忤物為之弗顧也性甘淡薄於書無所不讀為文雄  
贍追古作者所著有備忘錄慎菴等集若干卷藏于家  
嗚呼天下人物江右為盛而江右世家彭為盛彭之彥

公為盛然則公之行顧可使之泯泯無傳哉賢與時同官久知其博雅君子所狀必非過其實者故繁其詞而不殺云

贈文林郎江西道監察御史鄭君墓表

鄭氏在宋有名綺者浦江人事親至孝臨終誓子孫毋析產乾道中賜號冲素處士子孫世守其訓歷二百四十餘年宋元本朝皆旌其門子恨不識其子孫有為御史者謁予告曰佑義門之裔也先君棄世七年矣而墓



未有表懼善行之泯焉無聞冀有以白之子嘗歆慕鄭氏以為有三代之遺風故不以辭按狀君諱沂字景元別號菊軒高祖季二仕元由省元為叅尉自浦江遷常山曾祖朝宗祖辰表皆含章弗耀父德傳以才行薦試事地官出使閩越有能聲未幾以疾求退母程氏昆弟五人君行居四自幼穎敏能詩善書性極孝父在官隨侍不釋至七易寒暑備嘗艱辛而和豫之色不少替與昆弟處怡怡然永樂初家遭多事計資費不能支君恐

貽親憂乃極力當之業以不墜嘗總理一區租稅曰吾聞仁人君子惟以濟利為心若培克朘削者為利己也不知害已隨之矣用是小民感悅相率無後期者至於絕沒田土歲久為豪奸據匿而糧賦累及小民君慨然白于有司用是免代輸之患後雖遇君之子弟不論疏戚禮意必勤念君之德故也族庖既蕃一門同居迨二千口藹然雍睦無梗訓者有家塾焉恒延師儒合親黨子弟教育之居當水陸之衝凡搢紳官僚經過者必見

之君亦款留竟日夕或辯論古今人物微詞奧旨多出人意毗陵吳公以都給事中出宰常山聞君名往造其廬與語大悅歸謂僚友曰吾於是邑得子羽焉欲以賢良應詔君以親老固辭乃止二親年偕八旬餘康強無恙君別構堂以奉之扁曰怡樂與昆弟子姪朝夕會於堂下捧觴為壽及親沒塋祭一遵朱氏禮復構堂扁曰永思以寓終慕之情尤好施予見貧乏者濟之患難者恤之孤孽無依者婚嫁之有弗協於家而忿爭者陳大

義以感化之去家二里許有溪曰亭潭往來病涉多溺  
死君為置舟濟之里有王乙遭疫暴屍雖至親懼不敢  
近君為具棺瘞之凡所行之善多類此伯父景範以富  
室起實京師君嘗往省焉及卒曰毋苦其後也以子佑  
代時佑已從學日有造君諭之曰吾聞獨學無友則孤  
陋寡聞京師文物之淵藪汝往親之卒業焉佑承命而  
往景泰初遂登進士第擢監察御史君嘗以書勉其忠  
勤儉慎及佑使蜀便道歸省君曰汝承王命不可久於

此吾雖老邁有諸子在無慮也歲甲戌二月八日一疾而逝距生洪武癸酉四月十五日享年六十有二卜塋于江陽庵山之陽天順丁丑以佑貴贈君如其官配王氏先公九年卒贈孺人子男五人長某次某次某某女一適某孫男七人孫女五人嗚呼鄭君力學好善不干仕祿孝友刑于家德惠及于人慶澤衍于後是豈愧于義門之佳子弟哉是為表

進賢縣學教諭張先生墓表

嗚呼先生棄世在景泰六年十二月十三日距天順三年則四星終矣子滿自上饒至京師謁賢泣且告曰先人屬纊之際顧諸子曰李原德知我平生托其文以表吾墓足矣言畢而逝不肖奉先人遺命以來惟執事有以惠之昔賢方童丱時先生來主鄧庠師席至宣德改元春二月賢始為諸生是歲八月先生以大故去賢受業先生之門纔數月而誘引開導方殷自後粗有成立不至于棄才實先生啓之今先生遺命屬賢賢尚何辭

按國子學正張淵狀先生諱受字應祥其先河南信陽人曾祖某元末游宦江西之饒州祖友諒因移家廣信之上饒遂土著焉父明道不樂仕隱居靈溪母李氏洪武甲寅正月二十一日先生生焉自幼穎悟迥出等夷時翰林王欽止師道尊嚴先生往受學焉大肆其力於經史子集乃入郡庠未幾以學成貢入成均得友天下士子聞見益廣有聲搢紳間永樂丁亥召入文淵閣與脩大典明年秋闈遂中高第又明年春闈名在乙榜得

晉州儒學訓導丁酉秋浙省禮聘校文鄉闈尋以秩滿  
調鄧州先生曰晉庠之士非無成效者科目中否則有  
命焉今以此為功吾可必哉益脩教條以盡吾責而已  
庚子秋復校文於陝右宣德初丁內艱服闋除深州秩  
滿調溫州十年校文於福建正統戊午校文於河南凡  
四典文衡皆號得人秩滿考績應遷先生以老疾辭弗  
允遂陞進賢縣學教諭又六載致仕時年七十有七先  
生器宇魁梧襟懷洒落無斬絕崖岸之行接人和氣溢



於言面所至後學多造就如賢之疎鄙亦在門下而春坊庶子周旋禮部侍郎章綸監察御史王福生輩皆其高第論者以比安定然一官淹至三十年之久豈造物者有所乖歟雖然使先生不一任而躋膺仕則人才出其門者未必若是之盛由此觀之則先生顯晦自不可以尋常之見論也先生壽八十有二配同邑徐氏早卒繼晉州劉氏亦卒男曰真曰觀女適大學生宋福嘉者徐出也男曰湍女一適羅瑛一適童瑱一適宋友俊者

劉出也孫男曰琦曰瓘曰珙曰璘曰璩女六三在  
室曾孫男女十有四卒之明年八月卜塋邑之雙峯山  
下是為表

古穰集卷十五